

篷

窗

續

錄

尹太夫人八十序

內閣學士尹君楚珍改官禮曹

高宗純皇帝恩許歸養蓋太夫人年已七

十餘矣嘉慶

四年

詔徵君至京師俾條論時政仍以太夫人年高

加給事中銜俾歸終養且

特賜摺匣許由驛奏事一時士大夫以爲榮尹君瀕行
特過余邸云辛酉某月太夫人年八十乞余文爲壽余
文曷足重太夫人顧余與尹君先德松林舍人爲甲戌
同年同入詞館又同以樸拙甚相得尹君繼入詞館松
林又時使以所作詩賦就余商榷故朝紳之內知其家

事者莫若余使祝嘏之詞屬他人操筆不過推原母教
槩以九熊故事稱太夫人賢而已不能得其實也卽以
尹君謙直足以顯親揚名爲太夫人慶亦未盡得其實
也然則太夫人居心行事卓然與古人爭光者非余縷
述世弗能知余固弗得辭也蓋尹君之初遭外艱也奉
太夫人歸故里服闋以後卽擬請終養太夫人曰汝父
子世受

聖恩是不可不報以我老耶我固健以路遠耶我身自
往來亦三四月可到非必不能往返也尹君俛首不敢
答然終不治行李太夫人督促再三則踉出一簡曰服
官以來竊見外吏所爲有不愜於私心者出而不言此

心耿耿終不安言則書生一隅之見未必悉當於世務
或轉爲太夫人憂故甯不出也太夫人方據几坐索視
其稿振衣起立曰兒能上此卽受禍吾無憾雖並我受
禍亦無憾兒行矣自今以往爾置我度外我亦置爾度
外均無不可矣尹君之毅然抗疏蓋由於此士大夫間
有竊惜尹君不爲太夫人計者是烏知尹君又烏知太
夫人哉今太夫人耳目總明康強不衰上受格外之
恩榮下受南陔之孝養殆以閨壺之身而有士君子之
行以德邀福固其理耶抑嘗聞晉人之言曰廉頗藺相
如雖死千載下奕奕有生氣曹蜍李志雖見在奄奄如
泉下人然則人之壽與不壽不在年歲之脩短叔孫豹

所謂三不朽也太夫人之壽永矣豈復與尋常壽母較
年之大小哉余今老矣叨列六卿久無建白平生恒內
愧尹君今爲太夫人祝追憶舊聞又深愧於太夫人雖
不知太夫人視余何如或以此序據實成文差勝於泛
泛頌祝徒以期頤富貴相期者不棄其言爲欣然進一
觴亦未可知也

壽文入集濫觴於明歸震川先生然實有關於人品
者非泛作諛詞亦可偶錄一二

溼識

曹宗丞逸事

紀昀

曹慕堂宗丞余甲戌同年也交最契慕堂卒時余適以校理祕籍在灤陽闕爲面訣意恒盡然既而讀石君所作墓誌辛楣所作神道碑慨想生平宛如對晤不勝山陽隣笛之悲惟是慕堂立身之本末二君言之雖詳其文均篤實無愧詞足信天下而傳後世然有一二逸事爲碑誌所未及者乾隆辛巳余與慕堂同司翰林院事會有八九英俊與同館爭名相軋同中蜚語勢且挂白簡時余亦薄有聲譽方自危疑不能爲申雪惟坐清祕堂中與同事相嘆咤慕堂奮起拍案曰諸公以此事爲真耶則數人皆輕薄子耳何必爲悼惜如灼知其枉耶

則司院事者所司何事而噤口如寒蟬乃邀衆同詣長
院慕堂婉請曰據公所聞此數人褫職不蔽辜矣然公
此語從何來儻彈章一上事下刑曹無證佐不能成獄
願先示名姓併列於章中院長沈吟久之事竟中止後
入九人皆先後致通顯無知緣慕堂得免者慕堂亦終
身未自言也同年陳侍御裕齋年過四十未有子又有
所阻格不能置妾慕堂倡率鳩貲買一女送其家後舉
一子裕齋夫婦相繼歿有壻謀踞其餘貲百計媒孽孤
兒孀婦且旦夕不自存聞者扼腕然莫能爲力也慕堂
又鳩率同年仗義執詞逐壻子乃得安今日讀書成立
矣當時論者或以慕堂爲多事慕堂恬不介懷嗟乎朋

友以異姓列五倫所貴乎濟緩急恤患難不以生死易心也平時酒食徵逐聲氣攀援怡怡然親若兄弟及身遇小利害乃引嫌避怨坐視其後人之阽危亦安貴此朋友耶慕堂此舉余時有所牽制未能赴約然心恒愧焉論者乃以已不能爲轉非慕堂之能爲抑亦慎矣慕堂天性恬淡超然於聲利之外似不甚預人事者又和平靜穆言呐呐如不出而此二事乃見義必爲如此賢者固不測哉余十六七歲入名場三十通籍仕宦四十餘年閱事非一閱人亦非一求如慕堂之古誼指不數數屈也人往風微慨然遠想因書以示受之侍御兄弟俾存諸家乘焉

跋誠齋先生易傳

錢大昕

宋寶謀閣學士廬陵楊文節公易傳二十卷下筆於淳熙戊申八月脫藁於嘉泰甲子四月閱十有七年而成書既沒之後有稱其書於朝者敕降三省劄下吉州給筆札繕寫申進其子承議郎長孺具狀進之其說長於以史證經譚古今治亂安危賢姦消長之故反覆寓意有慨乎言之開首第一條論乾卦云君德惟剛則明於見善決於改過主善必堅去邪必決聲色不能惑小人不能移陰柔不能姦故亡漢不以成哀而以孝元亡唐不以穆敬而以文宗皆不剛健之過也嗚呼南渡之君臣優柔寡斷有君子而不用有小人而不去朝綱不正

國恥不雪日復一日而淪胥以亡識者謂惟剛健足以救之誠齋此傳其有所感而作與

跋渭南文集

錢大昕

今法有凌遲之刑蓋始於元明而不知其名之所自考
宋史刑法志載真宗時內官楊守珍使陝西督捕盜賊
請擒獲強盜至死者付臣凌遲用戒凶惡詔捕賊送所
屬依法論決毋用凌遲然則宋初已有凌遲之名而當
時未嘗用也後讀放翁奏狀有云伏覩律文罪雖甚重
不過處斬五季多故以常法爲不足於是始於法外特
置凌遲一條肌肉已盡而氣息未絕肝心聯絡而視聽
猶存感傷至和虧損仁政實非聖世所宜遵也議者謂
如支解人者非凌遲無以報之臣謂不然若支解人者
必報以凌遲則盜賊有滅人之族掘人之冢墓者亦將

滅其族掘其冢墓以報之乎若謂斬首不足禁姦則臣
亦有以折之昔三代用肉刑而隋唐之法杖背當時必
謂非肉刑杖背不足禁姦矣及漢文帝唐太宗一日除
之而犯法者乃益稀少仁之爲效如此其昭昭也欲望
聖慈特命有司除凌遲之刑以增國家太平之福乃知
此刑昉於五代而南渡時固已用之矣

與程秀才書

錢大昕

承以所著易源待正藁相示僕於經義素非專門先天無極之旨尤所不解今讀足下書所謂欽其實莫能若其器者也竊嘗思之宣尼學易但云可以無大過其贊顏氏子曰有不善未嘗不知知之未嘗復行聖賢學易不過欲保此身使無大過而已小過雖聖人未敢自信爲必無也故曰震无咎者存乎悔又曰无咎者善補過也聖人唯自覺其有過而悔之卽已不覺而人告之亦怵然爲戒卽悔卽改此不遠復无祇悔之所以元吉也若夫亢而有悔迷而終凶雖聖人亦末如之何也矣古之聖賢求易於人事故多憂患戒懼之詞後之儒者求

易於空虛故多高深窈妙之論聖人觀易不過辭變象
占四者今舍象占而求卦畫又舍卦畫而求畫前之易
欲以駕文王孔子之上自謂得千聖不傳之祕由是而
自處至高自信至深謂已之必無過且患人之言其過
辨論滋多義理益昧豈易之教固若是乎此僕之所以
不敢言易也

海舶三集序

劉大槐

乘五板之船浮於江淮潏然雲興勃然風起驚濤生巨浪作舟人僕夫失色相向以爲將有傾覆之憂沈淪之慘也又況海水之所汨沒渺爾無垠天吳睽暘魚鼉撞衝入於其中萍飄蓬轉一任其挂罥奔馳曾不能以自主故往往魄動神喪不待檣摧櫓折而夢寤爲之不甯顧乃俯仰自如吟詠自適馳想於沆瀣之虛寄情於霞虹之表翩然而藻思翔蔚然而鴻章著振開寶之餘風髣髴乎杜甫高岑之什此所謂神勇者矣余不謂然人臣懸君父之命於心大如日輪響如霆轟則其於外物也視之而不見其形聽之而不聞其聲彼其視海水之

蕩涵如重茵莞席之安視崇島之崕峴當前如翠屏之
列几硯之陳視百靈怪物之出沒而沈浮如佳花美竹
奇石之星羅於苑囿歌聲出金石若夫風潮澎湃之音
彼固有不及知者而又何震懼恐懼之有翰林徐君亮
直先生以康熙某年之月日奉使琉球歲且及周歌詩
且千百首名之曰海舶三集海內之薦紳大夫莫不聞
而知之矣後二十餘年先生既歸老於家乃命大槐爲
之序

送姚姬傳南歸序

劉大槐

古之賢人其所以得之於天者獨全故生而向學不待壯而其道已成既老而後從事則雖其極口夜之勤劬亦將徒勞而鮮獲姚君姬傳甫弱冠而學已無所不窺余甚畏之姬傳吾友季和之子其世父則南青也憶少時與南青遊南青年纔二十姬傳之尊府方垂髻未娶太夫人仁恭有禮余至其家則太夫人必命酒飲至夜分乃罷其後余漂流在外儻忽三十年歸與姬傳相見則姬傳之齒已過其尊府與余遊之歲矣明年余以經學應舉復至京師無何則聞姬傳已舉於鄉而來猶未娶也讀其所爲詩賦古文殆欲壓余輩而上之姬傳之

顯名當世固可前知獨余之窮如曩時而學殖將落對
姬傳不能不慨然而歎也昔王文成公童子時其父攜
至京師諸貴人見之謂宜以第一流自待文成問何爲
第一流諸貴人皆曰射策甲科爲顯官文成莞爾而笑
恐第一流當爲聖賢諸貴人乃皆大慚今天既賦姬傳
以不世之才而姬傳又深有志於古人之不朽其射策
甲科爲顯官不足爲姬傳道卽其區區以文章名於後
世亦非余之所望於姬傳孟子曰人皆可以爲堯舜以
堯舜爲不足爲謂之悖天有能爲堯舜之資而自謂不
能謂之慢天若夫擁旄仗鉞立功青海萬里之外此英
雄豪傑之所爲而余以爲抑其次也姬傳試於禮部不

售而歸遂書之以爲姬傳贈

正學論三

程晉芳

昔呂留良有私憾于黎洲注釋諸書力攻陸王之學而陸清獻爲一代大儒亦過信陳清澗之說附和呂氏於是海內士大夫以宗陽明爲恥而四十年來並程朱之脈亦無有續者此則非愚意料所及也夫陽明之學本於象山其爲流弊至使人自事其心束書不讀非其近禪之過乎然遂指陸王之學爲禪則愚不敢也蓋天下事視所歸宿而已矣二氏之書不事君親絕遠人事爲陸學者如何心隱李卓吾爲人口實者固有其人而末流如蔡維立金正希黃石齋劉念臺諸人其清忠大節足以扶維八極而謂二氏之教有是乎然必欲合朱陸

爲一而以爲皆可學則又非也詩家有李杜而杜可學
李不可學縹緲而蹈虛高明之極所謂學我者死也文
有八家而歐曾可學三蘇不必學氣息罕和平故也學
亦有正脈焉偏脈焉以陸王爲洪水猛獸攻之不遺餘
力是儒家惡習不可蹈也從而學之則過也宗程朱不
攻陸王吾於潛庵湯子有取焉且非惟陸王不必攻卽
二氏亦無煩指駁也方唐之時視二氏與孔子等昌黎
大聲疾呼發聾振聵而天下之耳目一新此其不朽之
功也由宋以來諸賢釐剔黃冠緇流之弊盡矣今海內
匪特無真儒亦且無真僧欲祛二氏非歐陽之本論不
可也江泌徐孝克雖事佛吾不能不謂之孝子顏曾公

文文山雖事佛吾不能不謂之忠臣士甫學爲儒先汲汲攻擊二氏亦近於習氣未化也然則守程朱之正脈自治於衾影幽暗之中博學於文約之以禮措諸事而正施之行而利余深有望於世之爲學者焉而非已之所能及也

正論學五

程晉芳

有儒者有學人儒者讀書不過多而皆得其精以內治其心外治其事學人旁搜博覽靡所不通而以經史爲歸期適用而已儒者學人合而爲一則爲大儒世不多覩也

國朝以來有三儒焉曰湯文正斌陸清獻隴其楊文定名時清獻之立朝治人可以無憾矣所微惜者攻陸王太過猶墮道學習氣也若潛庵賓賓則昭昭乎與日月並行玉粹金堅吾無間然矣而或者猶恨二公著述不多無以輔翼經傳夫顏淵仲弓之賢固嘗有著述耶必經傳輔翼而後稱賢則匡衡馬融爲賢於龔舍王烈耶

三大儒之外有三學人焉曰處士顧亭林炎武黃黎洲宗羲大學士李安溪光地安溪之學爲最醇仕太平之時事

仁聖之主其所施行皆有用無弊而人不以大儒歸之者以其心術之微多作用也亭林黎洲博極羣書其于古今治亂興廢得失之數皆融貫於胸中因筆之於書以爲世世法然亭林生於明末目擊寬弛之弊思以嚴厲矯之說近申韓幾不自覺使其術行必有礪礪不安處幸而不試故人寶其言而要之不可盡廢在審所用之而已黎洲於出處進退大端言之可謂確矣而其主意以爲不封建不井田則世不可以治此則迂生習見

不宜出於學人之口烏有經天緯地之才而不能達權
通變者乎前乎三人者有程雲莊焉金正希蔡維立之
師也當時如念臺石齋輩皆尊服之謂是三代以下第
一人鼎革之後逃於禪今其書具在其高明廣大之識
信乎爲曠世材而舉拂清言詆諆二氏究適依其門戶
宗事儒者亦已戾其大端賢哲不世出間一見焉而其
歸也不必由川以達海豈不重可惜乎今之學者不必
求爲過高之行亦無煩多讀未見之書惟是行已有恥
盟幽獨之中孝弟慈惠以自將希賢希聖不躡等以進
則亦庶乎其可矣

周易知旨編序

程晉芳

晉芳非能注易者也學易而已學之既久於漢唐以來講貫有得者好之甚斯著之其不合者間有辨論亦記於篇積以歲月遂成卷軸將以自誨疇敢誨人獨念易經輔嗣之廓清又得康伯仲達纂續疏解宋賢輩出大義愈明我朝安溪講肄於前家綿莊剖晰於後凡諸乘承比應之拘牽陽位陰位之傳會與夫互卦卦氣卦變方圓先後圖位固已一舉而空之宜乎四聖人之心思昭揭千古矣而三十年來學士大夫復倡漢學云易非數不明取輔嗣既掃之陳言一一研求南北同聲謂爲復古使其天資學力果能上逮九家吾猶謂之不知易

也况復好奇騁其志在爭名徒苦其心自墮於茫習之域不可歎耶且六十四卦象既備矣繫辭說卦所發揮數可知矣而學者必欲於所既有之外闡所本無曰不知數無以知來也噫諸子窮極漢學果克知來也耶京傳焦學而焦謂得其道以亡身程子謂邵子別是一種學問就令數學造極精微尙與周孔間隔數層而况聖人所不及知之旨後學轉知之斬勝於聖人毋人蹈至愚之謂乎愚之爲是編也蓋欲潛窺古聖作易之初謂人秉性以生性專而欲雜天秉理以運理正而數奇以多欲之人遇多奇之數其能有吉無凶免於悔吝乎賢人君子有可亨之道而值至困之時其何恃而不恐乎

夫是以寫憂患於文辭寄占驗於卜筮因筮以明義而全體大用不專在乎著卽數以知來而盡化窮神必根極乎理扶陽抑陰其大吉也屢險處困其大用也其所以該三極而彌六合者似奇而實平似遠而實近學者得其一節而行之修己治人恢乎裕矣晉芳雖能言之而檢束身心未能力行一二也安敢以爲教人之術乎

尙書今文釋義序

程晉芳

二帝三王之道莫備於書自天文輿地職官樂律禮制
刑罰之大者皆在焉由其道則治反其道則亂得其片
言微義皆足以措天下於磐石之安而綿翼子孫於世
世要其大旨不過二端知人安民而已非惇德允元則
不能知人人不知則民無自而安而安民之要未有過
於省刑薄稅者也余禱昧寡學何足以窺聖籍之淵深
然幼時幸從篤古者游側聞緒說好集經書剖別其得
失丁亥戊子間取伏書反復讀之意若有會取諸家注
釋擇其尤者次第著於篇凡五載而第一稿成癸巳之
夏從事四庫書所見書益多重加裒輯三年而第二稿

成又三年增刪改易第三稿成而余年已六十餘矣竊謂士君子治經之道必鉅細弗遺本末該貫而後其學成孔子之教人讀詩也曰可以興可以觀可以羣可以怨是言性情之觸發也曰邇之事父遠之事君是言著效之大也曰多識於鳥獸草木之名是言其纖悉必貫也明乎此則豈獨學詩爲然哉凡治經者視此矣孔傳雖晚出而得於周秦漢之舊聞者多數典辨物中者十之六七宋人取諸心得不免武斷之譏而於漢晉詁訓蔽塞叢結處亦頗爬梳一二均未可偏廢也矧說九族者不明五服之定制論五刑者不知肉刑之非古其有關於世道尤大余之爲是編也豈敢自謂跨軼前賢然

平心審擇二千年來講說之善者遐採旁搜遺漏者罕
矣其言之謬誤足熒聽聞者亦屢焉凡爲書四十卷錄
而藏之其耑釋二十八篇者伏之與梅去若霄壤在今
日已爲定論學者固宜分別觀之正無俟譟言詮釋也

與家綿莊書

程晉芳

足下所著彖爻求是說初讀之似平淡猶人耳及取古
賢所著諸易說相質證然後知茲書之精深窈奧不惟
突過古人並前此尊著易說二種亦無能及夫說易者
莫患乎好奇惟好奇故篤信圖象欲於方圓奇耦諸圖
探索其奧以冀推測而知來不知四聖人本無是學也
易者聖人窮理盡性至命之書理統乎數而數不能越
乎理雖極變化而皆有常道以馭之故文言釋坤之初
六特舉臣弑君子弑父爲言蓋變異之事於斯爲極天
地幾爲之晦昧矣而曰非一朝一夕之故其所由來者
漸一若理悖乎先而數乃應之則舍此而外更孰有數

先理後者乎天道無心而成化一切理數第扼其大端
小有罅漏要無虧於全體故有冬無冰而夏雨霜者矣
亦陰陽之乖錯使然而無害理之常行者使執此以驗
天心鮮不墮芒芻之域矣而篤信術數者猶曰聖人必
前知學易故也不知聖人之前知以理不以數千載以
下由吾道則治不由吾道則亂治亂之遲速久暫亦視
其理逆順多寡之所積故孔子告子張以所因所損益
皆極平正之理使孔子而知繼周者必秦繼秦者必漢
則聖人之體段精神轉局促矣或者又疑卜筮之法出
於易雖三錢響卜六壬奇門苟精其術靡不響應易之
旁推而不窮也如是夫江湖河海之支流有時散而爲

沼池溝澮矣循沼池溝澮指而目之曰是江湖河海之
支流則可也苟以沼池溝澮爲卽江卽湖卽河卽海其
可哉焦贛謂京房得其道以亡身知其信數不信理也
嚴君平爲人演卜語必根於忠孝知理之足以統數也
邵子皇極之書先儒且謂其別是一種學問他可知矣
故愚於足下說易之書深信不疑以視王輔嗣廓清之
功謂有過之無不及也

與家綿莊書三

程晉芳

一月來人事草草獲奉六月十日手書恍如熱熱者之就冰水心夷而目明信乎足下之能發我也由宋以來尊程朱者雖一言一唾亦以爲是有故焉不可議也躋之曾閔之班猶苦有憾蓋直以爲孔孟矣從而議其後者則又矜已之能抗不相下凡程朱所卓卓可師者視爲瓦礫土苴而以爲無用來書衡量輕重若權石之相程洵乎遽矣然愚所謂程朱不可輕議者非以其解經論學爲無可是正也其操心也純其制行也嚴其措諸事也明而有倫因是以其身爲百世師而人亦以是知二帝三王之道之可貴而可從雖其解經論學或合或

離欲不以道統歸之而誰歸乎陸王之學雖近於禪而卒歸於聖賢之域非如釋氏之忘親背本而安於無用也故愚以爲其終異者其始必不同釋氏之治其心與諸儒所以治其心者其迹異其始安得從同也顏李之學主於切實指近於日用事物之間如眉之着目而於存誠盡性之旨亦直截無糾蔓信可以補程朱所不及愚所疑者其自視太高視程朱太卑若已之說行而程朱之說可以盡廢斯則近於好爭取勝而忘先儒功力之大矣非謂程朱無一可議而顏李卒無可取也顧愚學殖膚淺於中庸大學之道曾未厯其藩而竊竊然好議論前人非足下力諍其過則且爲愚爲惑矢口勝說

而不知止足下沈潛於內聖外王之學於程朱所以離
合於孔孟之故與陸王顏李之優劣必能一一條辨愚
自揣學不及是不敢遽請稍俟異日問業於左右庶幾
祛其妄而警其櫛昧焉幸甚

與陸孝廉書

程晉芳

昨於覃溪學士座中談及易學學士盛稱足下於易最深而持論以爲易非象數不可徒以理解者皆妄也於漢上朱氏瞿唐來氏恒有取焉余聞之而皇然內思使先生之言果是則晉芳數十年學易之功誤投門逕矣然學問以明辨爲功朋友講習非導訣可了事敢以一二管見質之左右夫易之用寄於卜筮而其貫三才而成六位以通古今事物之變非卜筮所能盡也孔子願終身學易豈日從事於卜筮乎文王周公釋象釋爻其辭尙簡至文言繫辭說卦反覆詳盡矣其教人持身處世至確切矣而其所論象數具在簡編使如後世之圖

象果足以闡易之蘊者聖人何不作為一二以教人而
僅天一地二參天兩地數條而止乎且足下謂宋以來
之圖書果卽上古河洛之圖書乎來氏之易絜絜繩繩
果卽羲文周孔之道蘊乎夫由漢以迄唐飛伏世應卦
氣卦變互體之說由溺於卜筮而誤也由宋以來方圓
先後天黑白陰陽反對相生之圖由趨於象數而晦也
六十四卦以外無象奇耦上下六位以外無數若夫通
微闡幽自一至於無窮天下之事不可以布策灼龜而
悉得所謂雖聖人亦有所不知也君子之於易亦用以
自治其身心達於事物之變而已矣昔京房得焦贛之
學卒以亡身邵子之於數遂矣而宋賢尙謂其別是一

種學問觀其天津杜鵑之徵驗似屬前知然被髮以祭
執玉高卑昔賢固同此見不過察氣候以系微非藉卜
筮也非究象數也且如邵子所謂元會運世十二萬年
而一轉者其言足信乎士生三代以降文學不及游夏
而欲極數知來上追羲文之睿智不亦勞而鮮獲乎與
其千搜萬索卒不得其指要而徒弊精神曷若匡居玩
索研究乎輔嗣仲穎程朱以降諸書因理以明象數吉
凶悔吝之故識所從來於何歸宿爲不倍大義之正旨
也晉芳禱昧鮮學豈復好爲爭辨獨念易學在今日經
數大儒講明之後而倡漢學者取已闕之叢棘甯寘身
於中好圖學者又用心無所可用之地使四聖人之道

明而復悔豈不大可懼乎先生其勿爲詭隨進而教之

與周青載書

程晉芳

承惠碑刻數種眞十朋之益來指云北嶽題名年月事蹟視正史頗有參差今錄辛楣學士跋尾奉上亦可補朱萬諸公所未及第學士據碑駁史鄙見猶未然也從來嗜金石者謂據此足以輔正舊史夫舊史必須補正者人物之臧否政治之得失官階之進退皆事理之大若夫年月日時小有訛異此其關於事者淺以資考訂稱博雅則可矣謂之有碑於史將無一邱一垤欲以增泰華之高乎新唐書方鎮表易定始屬成德後隸義武節度使無所謂易定節度者豈其私稱固若是乎若證之於史則不宜有此且唐制節度兼數州郡不得專有

二州是年五月克用拔無極新城盧龍將李全忠敗還幽州襲其主帥李可舉可舉自焚全忠自爲留後並無幽州請就和斷事而常山屬成德節度使克用拔二城卽歸無問罪常山事金史百官志亦無都官員外郎大金國志雖載金初官無定制然以京朝官知外縣事唯宋制有之金則未見凡此皆鄙意所未安也金石文字自歐趙以來嗜好無異議而愚謂近今有二弊焉一則深巖邃谷求索者多人惡其勞則潛剗削之漢唐古蹟口就淪湮爲可惜也一則謬摹舊刻突出新碑以待好者求焉凡事久則弊生殆勢所必至要之金石固不可廢必取其大者如前所云以資考訂可也諸家正史及

通鑑通典歷朝會要諸書博採旁搜所取非一如以小事類棄正史而信碑碣則非余所敢出足下載而教之何如

讀關雎

程晉芳

以關雎爲刺譏吾無所容辨矣惟后妃樂得淑女以配君子由漢迄北宋多用是說夫太妃旣爲元妃奚必求窈窕之賢若欲讓居已右者雖甚盛德不必若是之拂情且諸侯一娶九女以后妃之賢勝從皆宜淑善足以佐助中宮而乃以偕行者爲不足以匹君子舍此而他求不已過乎原其說之久存不過以后妃不妬爲可風耳夫俗情諛行誠不妬甚難士之稍稍自立者卽能廣引同類無媚嫉心若大賢則奚止於是女子亦然后妃所以宣陰教贊聖治者非常情所能窺而徒以不妬爲首稱何見之小也子朱子疑之臆矣從匡衡之說蓋衡

學齊詩而毛傳固未嘗立異也然朱子指爲宮人所作則亦未見其然竊意當時婚姻之始和氣翔洽樂官作爲是詩奏之合巹而酌之時遂世世用之房中勿替蓋方景運初開文事曰盛摹寫思慕之忱曲盡而不傷於雅七月東山諸詩皆從此而仿不必以言之親切而謂非宮人不能作也吾友戴東原深於經論是詩與余合故詳辨之逸齋補傳則謂是詩畢公所作似不必定求其人以實之也

讀後漢書書後

程晉芳

三代以降士氣之盛無過於東京論者謂明章尙道崇儒所積而致愚則謂儒林一派開自西京其所由來者漸矣蓋自武帝立五經學登用儒士由秦以來風氣爲之一變特不能擇取眞儒舍仲舒之醇雅用平津之矯僞致飾儒術飾淺行以干大用者接踵而起匡張孔馬輩厯事元成遂拱手而授人以家國然而草野之間講習傳授自若也莽之纂也拒聘不仕以死者史不絕書光武明章遠承末緒又從而重之拜老臨雍憲言饋食所謂設誠而致行之者儒術盛而士氣奮矣假令取鑒前車謂文儒適足以悞國講搏擊鉤摘之法崇黃老申

韓之術東京之士習果有以優於西京乎噫由漢武以迄桓靈三百餘年積之如此其厚而上無精明濬哲之君柄臣豚人地遷用事清議在下黨禍遂興舉端人正士一舉而空之良可惜也夫國家須人至急方其求之之始下之應也或且眞少而僞多苟無術以擇之必且舍麥菽而取糠粃及其積之既久眞行著而風俗成雖復抑之屈之務使革而從我而有所不得賢者果無益於人國也哉余論古每以東京士習之醇爲西漢之所釀而成有明士氣之盛爲兩宋程朱之學所蘊而發後有識者當不謂斯言河漢也

唐律疏義跋

程晉芳

仲尼之門五尺童子羞稱五霸今之儒者述三代以後
令辟動輒曰漢文帝唐太宗不亦陋乎然文帝慙德猶
小唐太宗之失行則非士君子所忍道矣要其措天下
於治安厯祚三百年之久則以親見隋氏之醵刻而力
矯之於刑律一秉經術得甯寬毋濫之旨蓋自秦迄隋
殘人以逞法務刻深至唐而一變宋元兩代率遵唐制
讀義疏一書與刑統賦質證可以知之矣余求其書二
十年不可得最後始於四庫館見之讀之月餘而後知
天心之祚唐非無故也若其刊刻次第及卷軸之多寡
則小長盧朱氏言之悉矣

地理考原跋

程晉芳

江西熊君心泰著地理考原一卷首言楊廖二公九星陰陽及九星九變次破形家之誤次言水歸東海次言乾坤退居次言三合五行次言金生水次言六上次言二土長生次言土旺次言五運六氣次言支瓏淺深次言文曲破軍凡十三則古者族葬多在西北蓋北方高燥土厚水深不煩遠擇也堪輿之說蓋以東南地下多水而風臨之蟬蟻生焉爲人子者必欲以親體而求富貴罪之大者矣而詳視水蟻以安其親則固不可已也故論風水當以朱子爲斷而葬法則郭景純之葬經如經書之有學庸是一切書頭腦觀熊君所言不倍於景

純而又有以發明之可謂正則矣近有僞流創三元之說謂塋不可久視三元而遞遷可也嗚呼親膚旣掩非蟻非水而以禍福之故輕爲改易有不遭陰譴者乎創爲此說者其人旣不良死而舉世猶奉其言如圭璧焉富貴重而仁孝輕可慨也夫

論孫覲專祠摺子

陳明光

竊惟各直省建立先賢專祠許其裔孫承襲奉祀所以發潛德之幽光示人倫之模範自非德行純粹卽亦忠節昭彰名實相符始馨俎豆詎容僉王之士濫膺斯選臣前年忝貳禮臣初入容臺檢閱文冊見儀制司咨覆江蘇巡撫咨陽湖縣宋名臣孫覲奉祀生事臣與尙書汪守和等俱訝孫覲本非端人正士何以得稱爲名臣何以得與承襲奉祀當時因奉祀生孫畢唐本係旁支權充今已病故應以其嫡子孫原之嫡子熊飛接充臣部以與本部奏定章程不符應不准行所有孫畢唐遺缺應由該撫查明嫡長子孫承襲繪具詳細宗圖冊結

咨辦臣等因俟江蘇咨覆後再行核議具奏臣旋奉

命出在浙江學政抵浙視事後據嚴州府淳安縣詳宋

臣方應辰奉祀生事衢州府江山縣詳宋太學生徐應

鑣闔門殉節應予奉祀生事臣覆核方應辰宋時名儒

其祀典載在學政全書承襲奉祀條內固當准予接充

徐應鑣之一門忠烈係近從郡縣志乘查出雖尚未列

入學政全書亦復可與接充若宋孫覲則學政全書承

襲奉祀條內本無其名臣又伏讀四庫全書提要於孫

覲鴻慶居士集條下詳著其劾李綱附和議黃潛善汪

伯彥引之使掌誥命以贓罪斥提舉鴻慶宮故其文稱

鴻慶居士集陳振孫書錄解題言其生平出處至不足

道趙與時賓退錄摘其作韓忠武墓志極詆岳飛之謬
覲所爲詩文頗工尤長於四六與汪藻洪邁周必大聲
價相埒流傳藝苑已數百年今亦姑錄存之而具列其
穢迹於右一以節取其詞華一以見立身一敗詬辱千
秋清詞麗句轉有求其磨滅而不可得者亦足爲文士
之炯戒是則

謨訓所垂嚴於斧鉞如覲品行豈可復予祠祀以與名
儒名臣並列現在未知江蘇咨覆已達部否如其未達
臣愚伏懇

皇上特降諭旨黜其專祠永不承襲奉祀如其已達亦
懇敕交禮臣咨覆江蘇撫臣更正前誤庶俾文士知所

炯戒其於風俗人心似有關係

重刻居官寡過錄序

陳用光

昔魏弱翁爲丞相好觀漢故事及便宜章奏數條奏請施行賢臣賈誼鼂錯董仲舒等所言以爲古今異制方今務在奉行故事而已余嘗惜弱翁所奏二十三事孟堅未詳載其文欲博采他志傳稽其歲月以究其設施之迹而未暇也夫位高者務大體職近者察庶物天下之治由州縣始州縣之難爲也不履迹以求憲雖有愛民之實心不足以自效漢之去古近矣其所行之故事不必其同於三代也今之去漢遠矣其所當行之故事又不必其同於漢也其所謂故事者因革損益之大端也吾以爲今之爲州縣者且置因革損益爲後圖而先

勉其誠求于民之用心其心而不誠求也雖旦夕常行之吏事害在而不知所去利在而不知所循遑問乎其他其心而能誠求矣雖旦夕常行之吏事害在而即知所去利在而即知所循而遂可以徐及乎其他蓋別於大端之故事而又有所謂常行之故事焉君子之勤民宜以是爲兢兢也山右胡格臣衍虞著居官寡過錄一書其所言皆州縣常行之吏事也其所采之言皆前明及本

朝有守土之責者之條教蓋自制府中丞以至州縣司李及未仕者之論著條舉件繫皆冠以格臣所自爲之說約而賅切近而當於情事雖今日州縣皆可旦夕奉

之以爲誠求之道余從仙遊明府劉肖庵功傑所得之
亟勸其梓行以公諸世肖庵湖南人也爲仙遊有政聲
余先友袁易齋先生嘗宰湖南以治行最擢禮部主事
嘗著圖民錄一書亦深言誠求之道者余先君子嘗梓
藏其書今舉以贈肖庵乃言及格臣是書夫寡過者所
以誠求之階也能寡過而後能誠求勤民之君子其有
取於余言也已

鄧簣山墓表

陳用光

先生少家貧而勤于學問嘗假友人書舍讀書達旦不輟既舉于鄉遊蔡文恭公學幕及隨居澄懷園者數年學益進蓋四試禮部而後成進士既以知縣用歸家待選則益肆力于濂洛關閩之學植躬行己非義不蹈嘗曰才足有爲當自志有不爲始舍是而能自立未之有也居數年謁選得四川之綦江善聽訟蹈瑕抵隙使訟者不能遁其情及讞之成未嘗事敲撲也調署江津江津民宋志聰與黃君相不相能而楊在高在位與志聰爭博在位毆志聰仆死實尸君相所前江津令遂以君相論如律周秉魯使周景康索周應律財景康盜伐應

律樹應律刀毆之傷未至死居周宇先家應律控之典
史典史遣役往秉魯招景康偕役訴之縣中途景康不
能行互相怨秉魯毆景康死棄尸崖下誣謂應律實棄
之前江津令亦遂以爲應律當論如律也有控宋志聰
讞爲不實者重慶守王采珍舉待質中三人屬先生曰
死志聰者于此求之先生旣訊得實拘在位至在位亦
具服讞定上大府前江津令聞之屬居省會同鞠此獄
者謂君相已度死獄中第當如初讞重慶守不可劾前
江津令同鞠獄者適當楊在高論如律讞兩上按察使
不右先生先生爭之力按察使滋不說會周應律獄上
按察使曰應律毆景康矣景康之死不問秉魯可也先

生曰檢尸前後傷異處死于後傷之重不可以爲死于前傷之輕也且應律居距宇先家十里景康死之夕應律父子俱居家其鄰人皆知之何由棄之崖下乎文移再上比先生旋綦江獄始定當未定周應律獄時定遠縣民譚學海爲何人殺死定遠令拘韓奇元等六人訊之具服且從韓某家得所埋屠刀定遠令彌以爲不疑也比至郡迺稱冤檄先生往治之得鄧理瑤殷立璣二偷挾仇殺死狀論如律六人者迺得釋郡守胡承堊欲劾定遠令先生曰江津之讞人以某爲操切今周秉魯獄尙未定某何敢居平反之功乎固請之乃己先生治綦江二年聽斷敏而訟日就簡比再署江津適遇三

獄理枉獲實心力交瘁而僚案持之以惑大府非先生
聲望素著意不獲伸矣先是按察使嘗語某君曰爲令
但法鄧君足矣然則亦非不知先生者而顛言弗受遂
至聽熒以此見獲上之難也先生旋丁憂歸數年出補
陝西之洵陽洵陽民淳樸楚人之流寓洵陽者教之訟
因胥役有藉事爲患于鄉者控罷之遂持官短長官無
如之何先生至訪問民間疾苦一切以嚴明爲治而於
諸楚猶若無所問者徐廉得其斂錢諸簿籍置數人于
法洵陽以大治楚饑運米于洵陽洵陽人患之請于先
生旣勸以平糶矣而有力者尙蓄米居奇次年春楚人
率衆強借米距城二百里勢甚張先生從數人馳諭之

皆叩頭曰公活我先生令十二人從至縣十二人請由
徑行果先至縣訊之論如法畢中丞過洵陽聞而亟稱
之調署岐山旋調寶雞治俱如洵陽當在洵陽時畢中
丞再撫秦語先生曰君尙在山中耶素人以近南山州
縣調三輔者爲出山故中丞云然在寶雞時回民因五
爲亂于石峰堡先生防守縣境陟厓礪披箐篁民恃以
無恐及漢南援兵過境先生爲供其車馬乏困民皆應
役如趨私事既平他邑訟派累者相踵寶雞民乃製錦
爲縣官壽過客歎曰君豈有餘財爲供張耶官無所私
而區畫得宜乃使民知感如是孰謂廉吏不可爲耶頃
之擢知商州再擢知漢中府時先生年逾七十矣再護

漢興道將乞休歸制府宜綿以漢中守方防守西鄉乃令先生辦漢中府事先生募鄉勇相險易爲防守自冬徂夏跋涉山谷得足疾遂引疾歸歸十年就養於子傳安羅源縣官署嘉慶戊辰十月十八日卒享年八十有六先生故善爲文所著有櫟亭文集十六卷其他主端明鹿洞書院山長所誨示士子及在官所修志書復共若干卷先生官洵陽時答大府諮訪事宜諸官行文字皆詳究利病可資考核子傳安輯之爲外集先生所至興學校濬溝渠旌節義修廢墜與時消息所爲必果茲皆不書書其大者嘉慶二十二年陝西諸州縣民人請祀先生名宦祠巡撫聞于

朝得

旨如所請先生以乾隆甲子與先大父同事于鄉先生
用光大父行也顧未得謁見今得讀先生之文及傳安
所爲行狀以爲先生真不媿西漢經生循吏之目願請
祀名宦發于秦人而不能繼于蜀故用光所敘先生治
績詳于蜀而略于秦以告後人之學期爲世用者

武虛谷家傳

陳用光

君姓武名億字虛谷河南懷師人乾隆四十五年進士五十六年選山東博山知縣官七月而罷博山產煤炭上官取給焉使民挽運又按戶納錢買馬以增郵遞且充芻秣之費君皆裁去邑有孝子節婦必先榜其門而後具狀請旌又建范泉書院以教士居官數月耳欲爲者將次第舉行而杖軍役之事興軍役曹君錫杜成德者隸步軍統領衙門假緝捕爲名而招結無賴十一人橫行州縣人莫敢誰何入博山三日不去君則悉擒之將治以法君錫成德出牌擲堂上不稍屈君撻其脛而數之曰此

朝廷縣堂也余奉

朝廷命宰是堂者也余知有

朝廷烏知所謂之軍統領且牌稱所到之處報縣協捕若來三日矣不吾面何也牌稱二役耳十一人奚自來一一杖之君固以治營卒酗酒事巡撫欲君與某弁和君弗聽而積之忤也及聞是事慮獲咎於步軍統領又入丞劉某之謗遂劾君濫刑罷官日縣民赴省垣乞留者數百人巡撫悔之適入覲令君偕行爲謀捐復阿文成公在朝堂抗聲謂巡撫曰君劾某令何不明疏其罪顧乃以虛辭陷彊項吏耶時步軍統領意未解聞此言愈怒遂以吏議沮格之而君以不能復官歸君少有異

氣年十二卽能屬文塾師課之經輒能舉疑義以相質
難十七喪父十九喪母哀痛毀瘠以讀書自勵君父官
中外三十年無僭石儲君又不問生計衣食幾不能給
歲大水伊洛漫溢居室傾圯君自負敗木植泥潦間壅
以沙石覆葭葦穴一隙通天光偃僕而入不廢吟嘯嘗
於風雪中取枯柳供爨薪手僵斧墮傷足血淫淫滿
讀自若君身八尺腰腹十圍狀貌奇傑多膂力嘗攜弟
樞南歸方盛夏多雨過泥濘輒手助推挽足重繭不以
爲勞方未第時居京師從朱笥河先生遊及里居聞笥
河訃徒步往奔其喪嵩縣典史某賢而死於官貧不能
歸解衣資之去又嘗假賈息置義田以瘞遺骸在京師

某顯官爲君父門下士欲君一見終不往其天性摯愿而介介自守又如此君在笥河先生門以樸學爲同遊所推服其自京師旋貧不能歸仍至博山授徒東昌主講清源書院修魯山郟縣寶豐三縣志凡五年始歸里安陽令趙君希璜與君同受業於笥河先生者乃延君至署訂金石文字君旋以病歸家嘉慶四年十月二十九日君遂卒於家時大臣專疏薦君追

特召之旨下而君歿已逾月聞者無不惜之所著有經讀考異羣經義證三禮義證授堂笥記金石三跋授堂金石續跋偃師金石遺文補錄讀史金石集目錢譜授堂詩文若干卷

書許所望

陳用光

許所望字叔翹安徽懷遠縣諸生工爲詩而通兵法喜慷慨趨義嘉慶壬戌冬宿州亂民王朝明李勝才破宿州所望嘗率其戚屬王冠英出積粟三千石餉軍且助平賊於陳家集嘉慶癸酉秋九月河南亂民李文成據滑縣內結林清驚京師其黨走山東林清既伏誅山東旋平王師方會圍滑縣兩江總督百齡駐徐州安徽巡撫胡克家駐亳州爲江南防守亳州有歸德人楊七郎者盜魁也擁衆引河集其黨洪廣漢據保安山與潁州亂民沙占魁楊四王書子某互勾結伺隙未動胡中丞知所望名以書招之使帥鄉勇助防勦所望集邱惠齡

張國綱謝崇訓等十人爲隊長率八百人至亳霍邱民
乘亂攻掠者所望既往定之乃畫策曰楊七郎猛且狡
聞吾在軍備且密宣計誘之命張國綱謝崇訓率健兒
八人僞爲逃丐投詣楊楊果喜越五目誘至邱家集楊
忽疑曰若爲許所望來耶時楊衆百餘人崇訓出不意
斷楊左臂衆大驚張國綱疾呼曰吾張國綱也立擊殺
數人國綱萬人敵與邱惠齡同攻破宿州賊者賊素震
其名遂大潰所望率兵至賊黨擁七郎奔或謂七郎死
於路云於是保安山洪廣漢衆亦潰沙占魁等竄至永
城白廟所望追殺數人會滑縣平其餘黨來合與亳賊
南焚會亭所望戰於公基湖令列十火槍上塹土曰賊

至二百步發令衆伏地勿動曰槍發乘烟突擊之賊大潰追數十里斬獲無算亳州罷防守蓋不煩五營一弁一卒也當百制府防守徐州時儀徵縣屠倬率河南人張永祥團練鄉勇三百人將助徐州防事平解去張永祥嘗以鄉勇四百人擊破川楚賊於盧氏縣議功補外委阮中丞巡撫河南時嘗令其教五營槍法又攜之至浙依屠儀徵也張永祥不知書而恂恂如讀書之人人呼之爲張鐵槍云謝崇訓以功授練潭汛

論曰山東之平功由鹽運使劉清劉公爲余言河南亂民來山東者人雖衆心未必合若俟官兵集始擊之糧不足餉軍而賊志既定攻之難破吾既以語撫軍遂率

五百人破數千烏合之賊不折一兵而山東無虞非吾之能也國家之福也當川楚賊未起時官兵方征苗有大小章者犄犄也其習俗界於苗與民之間苗人畏之嘗力抗苗而官軍魚肉之迺怨而叛去淑浦嚴如燬卒招降之與共破苗嚴君後以佐川楚軍功官至漢中府知府自爲記其事始末甚悉嚴劉之功皆爲

朝廷顯擢矣人多知之者所望兩僻盧鳳道珠隆阿及胡中丞之敘功方以諸生應鄉試而張永祥今浮家於楊州余迺因吳清夫徵君賢湘所記所望事而刪潤論著之如此以語世之好奇者且附著張鐵槍云

道齊正軌序

錢儀吉

古今有異治乎無有也吏猶是也民猶是也條教號令猶是也上之所以願得於下下之所以願奉於上大抵務安靜而知尊親古今無以異也迺後世之治常不古若者何也催科不擾獄訟不留隆文教士讀法屬民善矣然而弱者泣隅强者捍綱猶往往不絕者何也則曰是養之教之之法未備也然或令焉不行行焉不效或稍效而不能以久且大者又何也中道疑且退則已耳誠有志焉必將仰睇古人良法美意其行而必效效而久且大者安在思其不合以求其合庶幾有利而無弊或多利而少弊也乎顧其事散在史冊未有薈萃成書

者高安朱文端公嘗撰歷代循吏傳取人過嚴又刪改史文事或不具觀者惜之此吾友鄒子鍾泉所以睪然望古奮筆有述也取馬班以來諸正史及季平王氏遠平邵氏抑之錢氏橫雲王氏諸別籍錄循良二百七十餘人其文悉仍舊史不易一字其事間有不可爲法者則削之而著其所以削之之故其利濟之尤大者與設施之尤精密者爲之論發明其用意附於本篇蓋欲明示天下後世士大夫有志於古者得是編慎思篤行神而明之取之各足用之不窮以大濟吾民而古治可復也則信乎古今無異治也雖然自周漢至于明遠矣其法制變革風俗推移豈能一一比而同之乎姑以郡縣

之政言之秦漢之始置郡也皆有兵至唐猶因之大縣亦開有焉中開晉以去郡兵而致寇亂干令升所謂方岳無鈞石之鎮關門無結草之固者也後代鑒而復之然而矯枉過正外重內輕至於五代藩鎮之禍極矣故宋藝祖不得不改法而文武異治以至於今也則治軍異井田封建之世田皆在官國如其家雖加於什一猶不遽爲桀也漢以後取民之制屢變於是條目分併公私改易之際有從其名不知異其實者有失其名更置其實者有強齊其名而尤大違其實者其輕重之不可強同也固也而其假手於有司者在唐宋時猶有公使倚閣諸名苟事有便宜雖專之可也故朱子戊申封事

謂祖宗舊法凡州縣催理官物九分以上住催版曹亦置不問君民兩足公私俱便自曾懷用事始除此法於是毫分銖兩必以登足爲限蓋宋南渡後始然矣迄於元明地大物博國用愈煩遂因而弗革則用財異若夫異端曲學俗學利祿之塗衆而士失其爲士之則游民未作淫奇衒鬻之徒縣而民失其爲民之常故道多歧足以沮吾教之事有非之不敢非者矣利相貿足以奪吾養之力有去之不能去者矣則士民之待治亦異至於氣習之剛柔事勢之利害逾時易地判然殊絕者尤不可悉數乃前後二千年間攷其治迹又終無有不同者何也在易中孚信及豚魚吉詩曰鼓鍾于宮聲聞于

外無它躬率之而已矣鄒子覽其迹探其本故特揭孔子德禮之訓以名其書德者成於已而後及於物者也禮者一日不可去身者也誠有是二者施之必恕勞之必信雖法制風俗之不同大抵居後代者稍難於前爲獨行者尤難於衆要於吾心之神明足以周於物吾身之行事足以服於人亦終無能沮之奪之者故文武同心何治軍之異凡寮案之離合視此矣公私一體何用財之異凡舉措之廢興準此矣絕旁驚之塗轍敬數人倫正學興而士皆有用矣簡不急之簿書專心民事農政勸而民莫不親矣顯導而默移一倡而百和至于教養之政成而德禮之風上下成俗大道之行刑措之盛

亦無以加茲而必起於有司之躬率是故得人尤難大
學平天下必歸本於一个臣之進賢退不肖其以此也
夫此誠堯舜禹湯文武周公爲治之本意而千古不易
之正軌也故俗醫常藥不足起癰癰曲木散材不足營
室居誠欲復古之治如是編所列其人也則必取法焉
鄒子表而出之其忠於事上而亟於惠民者意在斯乎
鄒子官河南有年士民多誦其治迹今方晝夜河壩從
拳莖之役況瘁甚矣猶時念此書之成而屬予序之以
爲有能用此而及於其民不必吾爲之猶在己也於虜
其可感也夫其尤足重也夫

吳仁齋六十序

錢儀吉

予客廣州故總督盧敏肅公屬予修鹽法志竣將告歸
公固止之曰昔儀徵公築學海堂課士于此也士多學
古治經者久而無以勸進之恐中怠幸子之來其爲我
強留必爲粵士益予乃止退惟所學謫陋無以稱公意
乃與學長林吳曾諸君謀爲專經課士法已又思粵故
多志節恬退之士其有懷道講學讀程朱書衡門自樂
而不出者乎哉得一二人焉有司者尊禮之爲國人矜
式亦足以興道厲俗矣盧公曰然子爲我物色之久之
而誠君乃告予以仁齋吳先生之爲人也先生幼讀書
卽喜聞前賢善行未弱冠從伍鑑渚勞莪野講易有得

已而窮治諸經積論說三四十卷儀徵公之至也獻其所著書嘗一至廣州尋還所居鶴山授徒大雁山下邨舍中窮且老矣盧公聞之大喜曰子必爲我致之幸甚是冬公下英德使聘先生爲講師明年先生來始相見也辱先生以予爲可語出所撰四庫全書提要跋語一首常篋藏不輕示人者文近萬言略謂我朝二百年來名臣先正若睢州平湖孝感安谿高安江陰諸公遺書具在皆聖賢爲師仁義爲歸道揆法守不敢踰越獨四庫館大臣司事者曾不念講道迪德之任風行草偃之速其所攷辨多毀斥宋儒微文巧詆詞氣輕薄近年以來學術士習已陰爲推移甚可懼也且覈其援引文字

又多疏舛條列而駁正之如陳清瀾之於姚江者蓋先生信道篤雖窮士而有世道之憂如此英德書院故縣人所爲例自求師雖總督命不易盧公曰然則奈何則命廣州守爲先生謀先生不可曰是貨之也盧公歎曰禮正人良不易於是先生窮益甚或絕炊與其長子文起曰噉土諸數枚讀書不輟盧公猶數問先生狀俄公卒予亦去粵予蓋甚愧先生然不必愧也不若是不足以見先生及來大梁得文起書歲丙申先生年六十矣欲得予文爲其親壽文起從予游治禮經甚精密亦能固窮者爰述予所見聞于先生者以畀文起屆日其偕若弟若子請先生老友鄧粹如胡道鄉輩及曾君坐一

室中無錢沽酒饌卽淪水熟土藷以進乃出予文誦之先生之前先生必輒然笑曰是知我也已

仁齋父子啖土藷讀書至旬日之久予所親見者嘗往訪之貌充愉如常欲稍飲助之竟不敢言而退曾勉士曰觀仁齋道德氣象天必佑之不於其身必於其子孫予則謂是能全其天者也其養生也不可謂不厚彼酣豢於富貴者直自戕耳勉士甚慙予言此序作於丙申之秋昨與鏡堂中丞論士先氣節因及仁齋之賢而以序質諸中丞竝錄一本寄四弟翼日過中丞所署按察步君在焉中丞迎謂予吳生得佳序可以不朽矣此亦應酬常語耳顧按察乃曰星湖

前輩在粵心許者其人老歲貢吳氏岳名鶴山人因道其言行蹤迹舉序中所言甚悉予乃竊歎中丞樂道人善有如此也卽記之以語吾弟且告子方子密兄弟少年聞人嘉言善行當謹識心胷間存而勿忘久乃與善化獲益無窮若聞人言某也才而巧某事得財利世俗多忻羨者亟掩耳走勿終聽舜黜之分如是而已

賈誼論

劉 開

君子不得志於當時或見知於異世異哉以賈生之才當時不能盡其用而後人亦莫白其志夫生以弱冠之年負命世之畧其規畫深切利弊近則救時遠可復古雖聖賢處此無以易其計使其不死文帝必終用之而漢治庶幾比隆前古史稱誼之所陳帝以次施行則帝之於生雖不卽用爲公卿未始不聽其言矣其不盡行其言者以其早卒也夫早卒生之不幸亦漢之不幸也漢用生一言而七國之變終不能越梁而害漢生之謀且見效於數十年後矣使生不能盡其才者天爲之也生之遇漢文也初爲博士遷爲中大夫者有年謫爲長

沙王傳者又踰四年既還爲梁王傳者又有年時見天下制度不立匈奴侵邊乃發憤而陳爲治安之策彼自以恩遇最深受知已久故不辭痛切陳之雖出以太息流涕而不爲過安得謂立談之間遽爲人痛哭耶且蘇氏亦知賈生之死爲梁王死耶非因漢文之不能用而死耶梁王勝墮馬斃生自傷哭泣宜也毒恨不食歲餘竟以悲死則情之過於厚也觀過可知仁矣夫過於仁不失爲君子而况爲其主乎爲主死而義不忍獨生誼之死誠未可以厚議也而子瞻乃以爲不用而死豈不誣哉方生謫長沙後文帝思之既召還見於宣室前席而聽其論自以爲不及乃用爲梁王太傅夫梁王帝之

愛于也少而好學故令誼爲傳不親信之而能若是乎
生旣在梁而朝廷數問以得失不思用其策而待之如
此乎親之信之且思用其策矣尙何不遇而自殘之有
且夫有志於利國者必不急於謀身有高世之識者必
無營祿之念以王者之佐而猶以功名得失之見度之
何淺之乎論生也至稱生之才志而貶其識量亦不能
得其實夫生之量固未見其爲小而識亦未見其不足
也昔者絳侯讒生矣及絳侯繫獄生上言遇大臣宜有
禮以此諷上量小者固如是乎夫識旣足以洞今古明
禮制防未然之患致累世之安而猶以爲不足何也吾
意蘇氏所謂不足者不知深交大臣以圖進用而遂其

志也夫必深交大臣而後可以得志此固賈生所不願爲也以此論生之識則誠乎其不足也且蘇氏嘗善司馬光矣光事有不便輒獨立異同夫光爲道義之臣與絳灌不同日論矣已尙不欲強合而謂生爲之乎當生過湘水爲文以弔屈原蓋自恨遇讒而不得行其道也非介懷於失職也若以當時之縈紆鬱悶爲生病然則屈原之放逐又何以怨乎世徒見蘇氏有不善處窮之言遂謂生之天絕田於遷謫不用雖名臣如孫文定亦謂生鬱長沙爲少不更事是皆讀漢書不詳之過也夫所貴乎論人者爲能平心以察實也考之不詳知之不審而輕於立議是徒逞一己之意見而使前賢蒙垢

於異世也夫蘇氏其失之偶者也近時士君子論古大抵類此焉已矣古之人有所謂屈於一時而伸於千載者難盡以望之後人矣賈生之志尙不能見白况其他乎然則爲古人者不亦難乎子瞻之論生其意固有在也彼謂生不愛其身而已數被斥逐九死無恙爲能善處困也彼且以爲量優於生也嗚乎三代而下果有優於生者其人哉

荀卿論

劉開

蘇子瞻以李斯之亂天下出於荀卿吾師惜抱先生辨之以爲秦壞先王之制始於商鞅不始於李斯斯之相秦並未用荀卿之道其論明且篤矣然子瞻豈不知荀卿過不及是而故欲文致其罪哉彼意不在荀卿假荀卿而發也夫荆公之學雖不及荀子然其所本者王道所稱者禮樂其高言激論未嘗不相似也子瞻見荆公欲興三代之治而執拗不通終以僨事故論荀卿而直指之曰意其爲人必剛愎自用而自許太過此非切中介甫之失乎新法之立託於先王其意本以治天下而非以亂天下其黨章惇等假其說以快報復卒至病國

害民流毒海內此雖羣小之罪未始非荆公爲之階也
故因李斯之禍而追咎於荀卿亦事之適相類者也荆
公廢夫子之春秋以天下之賢人君子爲不足用特激
於一往之意氣以孤行已見其後紹述之者乃欲舉天
下之善類而悉去之忠良盡矣國亦旋壞此固荆公所
不及料者也故曰其父殺人報仇其子必且行劫又曰
荀卿特以快一時之論不知其禍之遽至此也嗚乎是
亦可謂垂涕泣而言之矣子瞻論古之文多借諷時事
如始皇論及此篇是也彼言法宜平易以戒人主之果
殺此則隱指執政亂國而推原致禍之由其意一也吾
師所論者明荀卿之賢以斥其誣爲是非之公言之也

余所論者原子瞻之心而畧其辭兼時事之實言之也

樵者傳

劉 開

方來子行至山中陵絕澗抵崇崖徑迫狹不可舒步見
樵者擔薪自嶺而下履其徑如平地焉因謂之曰子之
行山性之乎習之乎樵者曰吾習之也非性之也雖然
吾生於山游於山食於山舍此無業焉夫何得不安之
若性乎方來子以其言之有契於心也且謂其健於步
也嗟歎而去既出谷口已近夷塗見向之擔薪者休於
道左訝之曰子非所謂健於步者乎何強於山而弱於
塗也樵者笑曰此乃吾之所謂強也吾家於山麓每旦
必入山析薪距山十里有市焉吾日鬻薪以易粟歸故
吾之勇於行也非故急也所以速吾獲也吾之稍休於

塗也非云倦也所以寬吾力也吾旦夕往還者數非暫
息不足以勝吾之勞吾所求者在山故常蓄其力以專
用之山而不使疲於途焉故吾所得之薪較多於他人
而身不覺其困是故山無盡材而吾常有餘力吾竊笑
夫世之游山者之惑也疲於行速於至竭終日之勞以
急於觀覽及至其地而力已耗竭不能遍探其勝盡歷
其奇彼之所觀者山也而乃至疲精道路是非敝其力
於無用耶抑亦欲速之念害其先耶且使游山者皆安
行而緩至及登陟之時乃始奮其勇往雖不能如吾之
履若平地安若性生其得於游者必多也何至盈而往
竭而返耶方來子聞之若不懌也曰是非徒健於步者

也非徒言之有契於心也是其於道也殆有合耶天下
之如游山者衆矣欲人之不惑不亦難乎天身有專務
人無全力欲急則反緩此得則彼失古之人所以勝於
今者無他不爲無益以害有益是之謂善用其力强弩
之末不能穿魯縞者竭也君子之養鋒蓄銳其於精神
意氣用其方新不用其既盛而况於垂竭乎然則樵者
之言未嘗無裨於爲學用世非但可爲游者警也樵者
姓周氏失其名

潛真子傳

劉開

潛真子居於楚境隱於九曲之山離俗自晦三年不出
應客其友鏡虛先生造而慰焉曰蓋聞賢者之處世也
不比物以求合不絕物以自異不枉道以希榮不懷道
以自逸在易有之由豫大有得是故君子以道濟天下
而天下賴以和樂在書有之一夫不獲則曰時予之辜
是故君子不以一身爲安而以萬姓爲安在詩有之訏
謨定命是故君子出則君享其成言則民獲其福在傳
有之立身行道揚名於後世以顯父母是故君子立功
以崇名崇名以顯親夫難得而易失者時也往而不可
再者機也是故君子乘時以行道因機以成事故能美

繼往古聲施來茲今子獨逃空寂而樂幽遐不求利人
無志用世意者非古之道乎潛真子曰非此之謂也夫
人之才各有所能性各有所近故雲起於山風起於谷
鳥樂於天而魚樂於淵彼此各適其性也安見天之是
而淵之非耶安見鳥之優而魚之劣耶安見飛者之巧
而躍者之拙耶夫唯有非常之才而後能建不世之業
故伊尹創基於亳太公鷹揚於周唯有所挾以趨事會
而後能有所忍以就功名故百里飯牛而秦得以興子
胥乞食而吳得以霸故古之欲有所爲者莫不深觀世
變而自計之審也夫巢由之不事堯舜自度其智不能
過夫稷契也四皓之不事漢自度其才不能勝於良平

蕭曹也無其德而居其位謂之尸祿無其能而任其事
謂之貪功尸祿者無效貪功者無成彼其之子不稱其
服無其德也夫知小而謀大力小而任重無其能也夫
故吾之逃於空寂也非敢以辭榮也自知其身而已吾
之樂夫幽遐也非敢以鳴高也自量其力而已天下之
能自量者鮮矣可以信諸已而不必卜於天者身也可
以信於人而不敢決於己者力也匹夫能立功於當世
者必其才之不可終抑而天又若有相之者故古之君
子不苟於富貴與俗浮沉以取榮名於天下遭逢適會
其時而其心必有深慕篤好非此不可者故後之君子
不虛得富貴今吾以迂拙之質負踈野之性處於卑下

乃其宜也安於貧賤亦其分也且獨不見夫燕雀之學
鴻鵠乎奮飛而前出乎林表爲回風所迫欲上不可欲
下不能其爲衆鳥笑也必矣是故知命者不惑量能者
鮮辱審時者可動吾自審久矣不欲妄以動也曰然則
吾子將何以自樂也曰吾何爲其不樂也吾旦而起晝
而讀夜而思何在非樂之時耶吾耕而食汲而飲非所
謂樂其業耶沉潛乎詩書之府優游乎道德之林非所
謂樂其天耶麋鹿之與居猿鶴之與友非所謂樂其羣
耶吾雖不能道濟天下而猶可爲政於一家吾雖不能
措萬姓之安而猶可盡羣物之變吾雖不能出而圖君
民之責而猶能靜以會陰陽之全吾雖不能因機以乘

時而猶可循分以安素南山有木風折其枝斧而薪之
可以濟炊中田有蔬採自雨後烹而羞之可以佐酒歲
時伏臘則炮羔燔豚集故舊招友生相與痛飲嬉言以
爲樂主賓無常少長以禮日之云夕歡猶未已既宴且
酣乃輸其誠告彼父老勉而農人努力耕桑以答昇平
戒爾悍民勗爾小子毋卽於邪以干國紀敦農勸織勉
善飭惡以美風俗以化鄉里是亦不得志於時者之所
以報國也奚必有位云爾哉莊周不云乎君子居上而
敬居下不爲害君子之道也夫居上而敬子幸能勉之
矣居下不爲害我其行之若夫無其德而思其位無其
能而求其事世或有之非吾之所敢知也鏡虛先生改

容而起敬曰善夫吾子之志非親承其教不能知也子
之離俗自晦非絕物以自異非懷道以自逸乃時而後
隱者也唯茲九曲非山之深乃人之靈朝斯夕斯唯君
子之宮請誌斯言以佩德馨

北魏主燾論

毛應覲

魏太平眞君七年誅沙門毀佛書佛像詔有司宣告征鎮諸有佛像胡書皆擊破焚燒太子晃素好佛法乃綏宣詔書使沙門多亡匿獲免或收佛像藏之越五年中常侍宗愛弒其君燾而立南安王余世之議者以魏主不得其終爲毀佛之報綱目亦嘗評之而余謂乃殺司徒崔浩之過何也魏主之被弒以追悼太子晃之卒而宗愛懼誅故弒之也太子晃何以卒以宗愛構仇尼道盛之罪而魏主斬道盛並坐東宮官屬因憂而卒也假使崔浩不殺宗愛之讒構或難遽入即使讒構生而崔浩必能預知其險暴以祛君心之惑而使魏主不信其

讒夫宗愛之讒不行道盛不斬東宮之屬不坐太子何
憂而卒太子不死則魏主無所悼傷而宗愛不懼何以
遽生弑君之心是魏主之弑非毀佛之報實殺賢臣崔
浩之報也况當佛之方毀惟太子晃崇信之而多所曲
護焉佛若有靈晃宜不死何因愛而卒反在魏主先也
吁楚王英好佛最先而卒致殺身梁主衍信佛最篤而
終得慘禍何世俗之多迷而不悟耶

王旦論

毛應觀

吾儒以身許國首戒一貪黷貨無厭適足喪身一行不
謹亦足敗節宋王旦當眞宗初年受不世之知竭誠殫
慮以忠於上兵息民安令行政舉稱賢相焉似不負吾
儒所學矣乃至大中祥符元年天書見於承天門羣臣
皆再拜賀而旦且跪進天書以授帝繼詔議封禪又以
旦兼封禪大禮使厥後得天書於泰山作玉清昭應宮
二年以方士王中正爲左武衛將軍四月丁謂上封禪
祥端圖而旦亦黽勉附會以從之四年奉天書以祀汾
陰王欽若爲禮儀使陳堯叟爲經度使而旦實兼大禮
使五年作會靈觀王欽若丁謂五鬼交通縱跡詭秘專

以道教祥瑞蠱惑君心而旦自謂業已同之而不能去
十月延恩殿說夢玉帝而旦亦再拜稱賀十一月卽以
旦兼玉清昭應宮使作景靈宮六年又獻天書於朝元
殿得芝草三萬七千本七年奉天書謁老子於太清宮
加太上老君混元上德皇帝號丁謂兼奉祀經度制置
使而旦又總大禮使噫上天不可侮小民不可欺乃野
鵬山鹿並見奏書秋早春雷率皆稱賀當時君臣一何
悖戾若是耶欽若丁謂逢君固位鄙夫固無足論已若
旦者讀聖賢書登進士第入學士選身居首輔與五鬼
附和同聲抑何顏之厚哉亦樽酒美味育以累之耳甚
矣貪之害大也假使眞宗賂以美珠旦卽封還之力言

天書之不可眞宗固素畏旦安知不格其非心引君當道何使悖謬一至於此乎顧不出此而受賂緘口俯首聽命何耶嗟乎天書之見孫奭疏凡三上語數千言會靈觀使王曾固辭不受惟知有義之二人者至今凜凜猶有大臣風以旦對此能無愧與迨及疾篤始悔前非屬其家人削髮披緇以斂晚矣綱目於其卒也書曰太尉玉清昭應宮使所以深醜之也而論者有謂瑕不掩圭持論亦過恕矣

丐孝子傳

毛應觀

庚寅歲余家居有丐叩門乞食余令家人出與之食家人入而告子曰門外有小車內坐老嫗一男一女約五六歲侍立其旁車中嫗是其老母丐者獨力肩引之以乞食余曰此孝子也令再與錢數百因呼內人與二孫曰汝等可出一觀焉繼內人與二孫入徐語余曰問其母係榮河人八十有五有腳疾伊子六十其媳亡一男一女其孫也方與之錢丐與其子俱跪謝謝畢丐者起遲二子從旁夾扶之丐者和顏悅色奉錢奉食於其母粗者稍分以給子嫗語人曰余老而疾累吾兒一至於此而丐者辭氣愈婉孝敬藹然於是隣里婦女聚觀各

出錢餅爭饋之余聞此不覺淚下曰此眞孝子也欲問其姓名贈以銀兩衣服而丐已輦母他去矣噫昔元初分人品爲十等曰儒曰丐彼欲以丐抑儒也豈知丐中固有儒者乎夫儒之本維孝丐而孝丐而儒者也儒而不孝儒不如丐矣且世之所以重儒者謂其異乎丐也而孰知其行事有甚於丐者乎丐不如儒以其丐也而有不丐之丐者又丐者所不屑爲矣何也丐而出於孝不得已而丐者也挽車勞也跪奉敬也悅色和也婉辭誠也二子扶持型也爭饋以食感也稍分於子慈也養志之道其盡於此乎一丐也而顛沛造次不離乎仁如此故不妨丐也亦不必自諱其丐也以此爲丐始可以

丐矣苟爲不然不丐之丐丐而不可令人知則真丐矣
則真有愧於丐且不如丐矣丐可泛以丐論哉吾甚惜
天下之多丐也吾更惜天下之不盡如此丐也天下苟
盡如此丐則天下無丐矣天下無丐則天下皆儒而天
下卽平於此一丐矣作丐孝子傳

循吏傳論

鄒鳴鶴

論曰大史公紀循吏首孫叔敖傳中如秋冬勸山採春
夏勸水採因民利而使以時如復郢市教高柵純任自
然近效遠法而先書其立政之本曰施教導民上下和
合世俗盛美政緩禁止詳繹導字緩字義蘊正孔子所
謂道之以德齊之以禮也後世矜尙才智集事而不免
生事卽才智有本而資以匡時者可以起積久之痼瘡
一世之變而究不足垂萬古之極極者中也正也惟中
正故百世可由者也史遷以叔敖冠循吏殆爲百世示
之極其憂深其旨微哉

論曰左氏記子產之言曰有德者能以寬服民其次莫

如猛三代上絕無以猛言治者自左氏託之子產而救
時賢佐政尙嚴明如武侯之治蜀景畧之治秦猶爲善
法子產者也乃至申韓商李下逮羅鉗吉綱之徒視民
如仇誅殺無算皆曰政莫如猛吾爲子產之所爲也嗚
呼一字之誣乃至開千古酷吏之端如此其烈哉夫平
天下之道首重在寬尙書屢言之不得已而用嚴乃以
濟寬之過寬固平嚴亦爲平也子產之治刑書以處族
大寵多之世欲使人人畏犯法知向善其用嚴也正其
所以爲惠人也猛則殘民以逞如淵獺之毆魚然如叢
鷁之毆雀然孔子曰苛政猛於虎曾是衆人之母而肯
出此哉雖然猛非道嚴亦非常道吏遷編循吏以子產

列道德齊禮之孫叔敖後傳中懸記治效終之日丁壯
號哭老人兒啼明其德澤之深如此而無一字及其作
用殆惟恐後世法其嚴而不知用嚴之心也卽孔子惠
人意也而豈知左氏反以爲猛哉余故特表之以爲子
產辨誣以爲後世解惑

論曰史記書公儀休相魯事如卻魚拔葵出婦燔機事
近瑣而防過峻似不近人情者之所爲而百官自正能
使食祿者不與民爭利何哉蓋利在民者必曲體民情
以利之利在己者則必先自絕情使嗜欲之萌窒澄清
之本立而百爾之窺伺我則效我者乃不期正而自無
不正後世中材以上孰不知以廉率屬而本源未澈間

隙偶留適令窺伺我則效我者投我閒而抵我隙始則細行不謹繼則貪日熾而民且不堪皆此嗜魚食茹好布之類爲之緣也大學末章曰畜馬乘不察於雞豚伐冰之家不畜牛羊百乘之家不畜聚斂之臣爲上者防微杜漸必自不察雞豚不畜牛羊始公儀休深得此旨不近情而大順民情庶幾不以利爲利而利民利國者哉

論曰政莫大於教養而教養之先後則視其地與時蜀地僻陋有蠻夷風欲化蠻夷而進之以齊魯教其先務哉雖然教亦多術矣高選蜀生詣京師受業術以倡之也成都修學招弟子而除更縣術以聚之也便坐受事

出行與俱使吏民見而榮之術以誘且進之也知倡之
矣而不知所以聚知聚之矣而不知所以誘且進教其
能成哉而近世言教者畧觀文藝索瘢求疵乃曰是邦
無人才也否則以一二士習尚佻達乃曰大都不率教
也嗚呼毋乃重誣我俊乂而於文翁倡之聚之誘且進
之之術茫乎未有聞哉班氏大書曰至武帝時乃令天
下郡國皆立學校官自文翁爲之始今天下郡國皆有
學校官逾二千年矣文翁功在後世而瞽宗之祀缺如
可慨矣哉

論曰循良吏首重惟德次惟才德量有深淺才量有大
小非可一言竟也次公之治班氏首稱曰明敏內察又

曰足知善御衆故於迎勞屬吏道旁攫肉事及區處莖
者識事聰明吏驚爲神之屬詳哉言之其才固絕類超
羣也然俗尙嚴酷而獨用寬和法去泰甚而務在成就
全安一切持平不尙律令蓋此公本有德之士而習術
兼人凡所設施莫不造其顛而詣其微人見以爲才且
見以爲才之大實則以德爲之內主而才量更逾於德
量故不覺彌綸周浹若此也後世以粥粥無能爲德試
之繁劇動多竭蹶乃曰吾非尙才吏也徒德實不足以
治也抑知天下無無才之德亦無無德之才無才之德
用之不足以治無德之才用之不足以治而大足以害
治其亦取次公傳而三復之哉

論曰余三復漢書朱仲卿傳而知王道之行易易也仲卿官桐鄉嗇夫職最卑施必不廣而其病且死也屬之子必葬我桐鄉以爲後世子孫奉嘗我不如桐鄉民桐鄉民果然共爲起冢立祠歲時祠祭至今不絕若蓍龜然若符節然何哉仲卿不以民視民而以子孫視其民民自不以嗇夫視仲卿而以祖父視仲卿仲卿之施於民見於史者不過存聞耆老孤寡遇之有恩寥寥一二端耳而其心民之心則保抱之扶持之時其饑寒而衣食之時其急難而拯救之凡祖父所欲施於子孫而不能必逮於子孫者仲卿之力有未及仲卿之心度無不能盡民之心仲卿之心也一如子孫有求於祖父而不能

必得於祖父而斷無不至誠至感於其祖父者。也人情之自然通於天理。天理之當然推爲王道。故曰王道之行易易也。而或者以是爲沽名釣譽。嗟乎士大夫不自盡其名譽之實而動以卓然立名譽者。爲虛彼卽不知有王道矣。豈不知有人情哉。天理哉。

論曰。惟至誠惟能動物。惟先聲能奪人。觀於龔少卿治渤海事。猶信渤海歲饑盜賊並起二千石至不能禽治亂亦甚矣。少卿奉宣帝命單車獨行至郡下令遣還兵罷逐捕吏諸持鉏鉤田器者皆爲良民持兵者迺爲盜賊盜賊果棄兵弩持鉏鉤卽時解散論者皆驚其治之速效之奇抑知皆其積誠先入所由來非一朝一夕之

故耶設易他守處盜竄惟恃單車獨行還兵逐吏如少卿事卽不爲盜禽盜益滋蔓耳少卿之諫昌邑王賀引經義陳禍福至涕泣膝行左右侍御皆出涕誠矣迨昌邑嗣位諫爭愈力誓以死徇後雖髡爲城旦其誠益昭然衆著於普天之下矣渤海亦猶郡也盜賊亦猶人也少卿未至其先聲已徧播於渤海之人之耳其至誠已深入乎渤海之人之心而况單車獨行還兵逐吏坦然出肺肝相示一如涕泣膝行時之悉本至誠哉近世治盜賊者緩則以刑急則以兵有謂此輩亦可以至誠動先聲奪也鮮不笑其迂疑其無效曷不取少卿治渤海事一再思之耶然溯所由來豈一朝一夕之故耶

論曰近世長吏以養民爲心者鮮矣卽以養民爲心而泛泛焉行之亟亟焉圖之不能相天時度地利用人和舉尙書六府三事周官大司徒之職以眞精神融貫其間而遂謂能盡養之之事窮養之之效哉若班史之紀召翁卿乃眞能養民者矣養民而民不知所以養故始之以躬耕勸農出入阡陌所以先之勞之也先勞盡矣而民仍不知所以養故繼之以行視水泉開通溝瀆起提閼數十處溝瀆與提閼功相濟也而常至相悖有溝瀆無提閼則洩提閼於所不當提閼則壅洩與壅各宜其宜因地因時因人乃悉宜之必深明水性而後實獲水利此眞養民之大經濟哉雖然經濟宏矣與其利而

不防其害無益也翁卿乃爲作均水約束刻石田畔水
多均之少水少均之多水近遠則均以引近至遠水高
下則均以引高就下爭尺寸爭杯勺並爭刻畧約束之
使無爭庶幾無弊而利眞興矣雖然開其源而不節其
流仍無益也民富則易奢靡民富則好遊敖翁卿乃制
爲嫁娶送終之禮務出儉約而斥罷其不勸田作者利
用厚生先以正德三事所以維六府也大司徒所屬諸
職大都言養而統之以掌邦教教正爲養計也翁卿其
眞能養民者哉雖然羣有司鳩之聚之而一人耗之奢
侈者久必培克吾爲小民慮矣翁卿之奏請上林宮館
勿復繕治供張減過太半爲天子崇節儉正爲百姓足

財用計慮至深遠也雖然百物產於地而實生於天順時則生氣遂違時則生氣竭冬生葱韭菜茹爲物雖微太官種此不時物民間必有效尤者悉行奏罷生氣遂矣百物昌矣以飭化責之人以則壤責之地而以調燮權之天翁卿精神融貫如是是真窮盡養民之事之效者哉元始四年詔書祀卿士有益於民者蜀郡以文翁應而九江以召父應文翁之教千古教民之法也召父之養千古養民之法也盛矣哉

論曰禮曰禮時爲大順次之體次之宜次之詩曰宜民宜人宜可不辨之早擇之精哉一事一物有宜萬事萬物各有宜得宜則益固益損亦可益不得宜則損固損

益亦爲損而所謂宜者在處事與物者之心而實卽在
事與物之中事其事物其物而宜出焉宜又何容遠求
哉桂陽樂交州俗不知禮則衛颯爲修庠序之教設婚
姻之禮宜之彰明較著者也含涯潁陽曲江三邑爲桂
陽最遠地山溪民不輸租而千里傳役一吏出徭及數
姓民苦傳役之擾而官尙以不輸租爲民病不宜甚矣
颯乃鑿山開道列亭傳置郵驛役省勞息流民漸集願
輸租賦國有租賦之益而民猶以得免傳役爲大幸宜
莫甚矣而亭傳郵驛乃含涯等邑應爲之事太守特事
其事耳未陽鐵石利也他郡民招徠亡命聚會私鑄利
之害也棄鐵石而封禁之是棄利矣惟利鐵石而任其

會害將滋矣。嫗乃上起鐵官，罷斥私鑄，鑄石之利日增。而董之官司約束亡命，乃有利而無害。此其宜非卽在事事物物中哉？范史稱之曰：理恤民事，居官如家，莫不合於物宜。夫居家與居官一理，宜於家無不宜於民者，宜果何容遠求哉？

論曰：任延凡守五郡，會稽九真、武威、潁川、河內也。潁川河內之治，傳不載。會稽俗尚文，延之祠祀季札，慰勉孝子，聘禮董子，儀嚴子陵，龍邱萇諸高士，因俗之文而以文治也。武威地近邊，俗尚武，延之選集武略士，據要害，力禦寇虜，因俗之武而以武治也。世之號儒吏者，以明禮愛士相高，而鋤強擊暴力有未遑，其以鋤強擊暴爲

能者則反以明禮愛士爲迂闊其亦昧於因俗制宜之道哉雖然因俗之治順而易革俗之治逆而難九真俗尙射獵不知牛耕延乃鑄作田器教之墾闢開廣百姓充給九真無嫁娶禮法夫婦自耦父子異姓延乃下令使男年二十至五十女年十五至四十皆配以年齒貧無聘禮者省奉祿資助同時相聚至二千餘人九真民始知父子夫婦之禮遂至風雨順節蠻夷慕義保塞偵候戍卒一切止罷嗟乎貧者使之知養情者使之力田蠶而亂者使之明倫理憫其舊染而一新之司牧者之責始盡也而治效所推乃至陰陽和化育贊異類歸誠有是感必有是應也世乃小視郡邑吏而郡邑吏亦規

模自狹何哉抑余又有感焉延守武威時帝親見戒之
曰善事上官無失名譽自以其骨鯁成性也而延不敢
奉詔以上下雷同非陛下福對臣固知敬君矣君其先
能知臣恤臣哉而其誅豪右之田紺破紺少子尙黨與
數百人威行境內絕無制之阻之者漢代郡守本有兵
屬且得以郡自專事權歸一故治無不效效無不大且
速如是知人安可不先論世哉

論曰治河之書大備於明之潘季馴

本朝之朱靳張嵇諸名臣其大要有三曰審天時盡地
勢策人力而由地上行者順而納之地中則盡地勢尤
爲三者之至要善乎王景之修汴渠也以商度地勢爲

大綱其條目曰鑿山阜破砥績山阜砥績土石之沮水者也鑿破之而沮者通又曰直截溝澗溝澗旁水之洩水者也直截之而洩者聚聚之驟且盛則爲衝要景乃防遏之而衝要平聚之久且長則不能無壅積景乃疏決之而壅積去而其變通神明者則尤在更相洄注之法蓋河水盛則必旁溢旁溢甚則下游必緩而滯景之法以十里立一水門旁溢之水由水門聚而出分流十里盛者必衰衰者必緩復由水門聚而入入則復盛盛則復溢仍由水門聚而出出入盛衰以地制水以我定地乃歷千里而無溢無滯實不外商度地勢一語盡之也潘季馴之治漕河相地建設閘壩啟閉巡環以之洩

振卽以之刷濁與十里河注之法相仿奏效亦速余始以爲變通神明殆由天授詳繹王景傳乃知季馴之能治河季馴之能師古也季馴之能師古而不泥古也是故善治河者不可不善讀書

論曰王渙爲兗州刺史史稱其繩正部郡風威大行而實績不詳其令溫縣則曰以方略討擊姦猾悉誅之境內清夷令洛陽則曰曲盡情詐壓塞羣疑發姦擿伏京師歎爲神算述其所爲大抵以緝暴折獄爲治夫子所謂道之以政齊之以刑者也而渙之病卒也男女老壯致奠醢以千數立祠安陽亭西每食輒弦歌而薦之其感人之深如此豈政刑之效反勝於德禮耶抑史所傳

皆政刑麤迹而德禮則書闕有問耶夫上之施於民也
有德禮政刑之分下之受於上也惟知生我者父母而
已無德禮政刑之分並不知有德禮政刑之名溫邑多
姦猾積爲人患渙患民之患而以擊討除其患溫邑民
生矣洛陽本都邑多冤嫌久訟史稱爲厯政所不斷法
理所難平不斷者渙必欲斷之難平者渙必欲平之曰
曲盡曰壓塞曰發擿皆其不忍人之心所旁皇周浹布
濩彌綸正用之反用之參互錯綜用之務期於訟獄衰
息民慶更生而後止其政刑也本之德禮也其政刑也
卽其德禮也民亦知生我者王渙而已何知有德禮政
刑之異耶民苦饑寒則以養爲生民苦蠢愚則以教爲

生民苦盜賊獄訟則以緝暴折獄爲生相其所急而急治之而急生之循良之道盡矣是故學循良者無務虛名而重實濟無浮慕古風而力救時弊

論曰循績之效可以格天神可以信豚魚一理貫之而已獨至東漢孟嘗傳上虞應雨合浦還珠二事有可疑者上虞孝婦某以冤死罪在太守何與民事郡中連旱禱請無獲是上虞民受官虐又遭天禍脫非孟嘗戮訟者謝冤魂饑饉將無已時帝德好生其理安在合浦不產穀而海出珠寶天所以生此合浦民也太守貪穢珠徙民困貧者至餓死於道因太守之罪而罪及小民迨孟嘗革易前弊去珠復還民已餓死多矣天理之不可

解者也既而思之天之欲生此上虞合浦民者理之常也
也因冤氣而致旱因貪穢而徙珠者數之偶也天不忍
終禍此上虞合浦民而假手孟嘗拯救之者數之偶終
歸於理之常也數萬而理一數屢易而理不易古之君
子盡已以治民修德以格天一率其理之常而數不能
違數且受轉移焉孟嘗其信理以合天者哉夫一太守
構冤獄行穢政而一郡被其禍一太守平冤獄革穢政
而一郡蒙其福以禍若彼以福若此官與民真息息相
通守土者可不懼哉擇守土者可不懼哉

論曰民生本安也民氣本靜也擾之而安者不安靜者
不靜雖然有官擾有民擾擾由於民而官無以治之使

安且靜焉有官如無官然民不自擾而官以治之者擾之有官反不如無官官之是非得失甚非可以一言蔽也會稽山水清越民俗愿樸有白首不入城市者民不自擾可知乃官吏煩苛非法遂至發求至夜不絕狗吠竟夕民不自擾而官擾之矣劉寵之守會稽也史不詳其治迹惟於煩苛曰簡除非法曰禁察以此心之不擾還民俗之不擾而已他何事焉而其去郡之日諸父老從若邪山谷間出人齎百錢奉送依依然如慕如訴不曰太守利若何興弊若何除惟曰下車以來狗不夜吠民不見吏而已不曰民何以不見吏狗何以不夜吠惟曰他守發求至夜不絕狗吠竟夕太息於他守之多擾

而欣幸於今守之不擾而已他何頌焉夫他守之發求至夜不絕他守方以爲力役之征正供之取治民不得不爾也治民而適以擾民他守豈始念及此雖然處不擾之地莅不擾之民乃至民以爲煩苛非法而猶斷斷然自以爲治民不得不爾他守之心何心耶漢詔以日計不足月計有餘明治效而鄭重於安靜之吏惴惴無華其有鑒於斯也夫其有鑒於斯也夫

論曰仇鑒一蒲亭長耳勸人生業至果菜爲限鷄豕有數其剽輕少年皆役以田桑嚴設科罰教養之事備矣而於不孝子陳元事親詣其家勉以孝行譬以禍福使元卒成孝子鄉邑爲之諺曰父母何在在我庭化我鷗

鵲哺所生一誠之感人如此雖然感人以誠不在一時一事之言教而在平日之積誠尤在本身之至誠設仇覽平日之誠不積本身之誠不至不過一亭長親詣人家勉孝行譬禍福即使深厚愷切惻惻動人遂能化不孝子爲孝子哉遂能起鄉邑之歌謠成期年之大化哉史稱仇覽雖在晏居必以禮自整妻子有過輒免冠自責妻子庭謝候覽冠乃敢升堂家人莫見喜怒聲色之異其內行之誠如此其至是以正色責符融林宗聞而下拜朋友化其誠矣王渙服其德化歎爲鸞鳳上官化其誠矣誠之彌綸周浹如此不孝子亦人類耳蒲亭鄉亦人居耳有不肌膚浹之而寤寐服之者耶是故誠無

不動人盡知之然必內之外之始之終之無不誠無不至而後無不動求之於一時一事有應有不應而曰誠亦有不動者豈理也哉

論曰掾屬之有長官勢也分也而有上下之義焉有上下扶持之情焉三代以還澆薄成風勢在則長官勢去則路人矣分定則尊之畏之如雷霆分易則棄之置之如弁髦矣逆旅中遇主人未嘗不揖讓周旋歡然相見一出戶而姓氏輒忘以余所見大抵然也苟或不然則畏故主之責備塞旁觀之清議文貌如舊眞意全漓而謂能冒不韙蹈險阻視長官之急如己之急耶若童恢者爲司徒楊賜掾屬值賜被劾當免不謀於人不計其

害獨身至關爭之賜乃得理嗟乎賜豈止童恢一掾屬哉賜任司徒而諸掾屬奔走恐後賜去司徒而諸掾屬投刺悉去彼直以爲勢應耳分應耳恬然不以爲怪也恢則曰獨忘上下之義哉獨忘上下扶持之情哉情與義其勢分所閒者而忍不急長官之急如己之急哉夫五倫之道以情與義爲權衡漢代公孤及刺史郡守皆自辟掾屬故有舉主府主之稱義猶君臣情則朋友盡倫者所當急講也而世俗習焉不察并紀載亦罕言其理余故於恢他政不具論論力援楊賜事以爲後世事長官者法

良吏傳論

鄒鳴鶴

論曰晉承三國擾攘後尙清談重門第經術中絕吏治不講人才去漢世遠甚魯之刺并荆青三州守安南天水廣平三郡所至著名跡而天水稱最蓋其地鄰後漢時武侯圖中原屢伐天水戶口減削寇盜充斥芝爲傾心鎮衛更造城市數年間舊境悉復夷夏慕德其治績卓卓方之兩漢循良殆有過焉而尤難在忠於曹爽一事爽輔政時芝屢進讜言弗納爽將誅時芝率衆斬關赴難進謀仍弗納迫坐爽下獄當死而口不訟直志不苟免其純忠大節行誼誠有大過人者夫有過人之治績者不必有過人之行誼而必行誼過人其治績乃由

中而可大可久此蓋根諸性情本諸學問風會不得而移之時代豈得而限之哉武帝稱芝清忠履正羊叔子以車騎將軍讓芝奏曰魯芝潔身寡欲和而不同晉代乃有斯人斯人殆足爲晉代重宜其褻然爲良吏首哉論曰胡威嗣父質均以清忠著稱威入朝武帝以卿孰與父清問對曰臣父清恐人知臣清恐人不知是臣不及遠也恐人知則直修恐人不知則近名其差等有判然者余以爲威能爲是言且能以是言告其主必非有意近名者世當衰晚堂廉闊絕人情變幻以一清爲之的則風聲樹而莠言不興疑似消而張弛有準恐人不知正欲人人知吾清效吾清勿濶吾清大有益於吾君

吾國吾政吾民也我輩矯矯錚錚大抵迫於時世亦惟求其清之本於中耳清之要於久耳不然宋趙清獻公一琴一鶴

本朝陸清獻公舟載紡具湯文正公嘗語僚屬曰吾飲吳中一杯水耳其標格都覺不凡豈以爲名也哉考威弟黻子弈位皆顯達晉陽秋曰黻與弈並以潔行垂名殆三世四人共矢一清者其本於中何如其要於久何如表正則影端以此驗之僚屬且然驗之天下且然而况父之於子祖之於孫兄之於弟近在門庭者耶嗚乎是可以風矣

論曰吳隱之以清操著晉世史不載他政而守晉陵則

紀其妻自負薪刺廣州則紀其食菜及乾魚爲廷尉中
丞左衛將軍則紀其冬月無被披絮澣衣甚至並日充
食酌水明心嫁女無辦則牽犬賣之妻齋沈香一斤則
投之水詳哉言之不覺意之重而詞之複余始不得其
解迨細繹良吏傳序曰晉代政刑私謂賄賂公行結綬
者以放濁爲通彈冠者以苟得爲貴其風俗卑汙甚矣
隱之獨清於皆濁獨醒於皆醉其心殆欲盡矯一世之
所爲甯使不近人情必求其充類至盡而後足以厲俗
而易俗也史家深鑒其衷稱述惟恐不備摩繪惟恐不
盡固欲使後世仕宦者人貴自立即處卑汙如晉世獨
醒獨清自可出汙泥而不染非惟不染且可離羣絕類

一清澈底至此又以見宇宙清明之氣亘古常新每獨
鍾於一二人之身碩果存而天心自見也然則處濁世
而以多自解以同自慰動謂錮習已成無從振拔者其
有愧隱之何如而處盛世而自甘庸下直以仕宦爲妻
妾宮室窮乏地者不更有愧於隱之耶隱之眞清其名
更出胡威諸人上晉史以爲良吏後勁有以哉

治生吞鴉片烟用生甘草三錢胆礬三錢研末淨蜜四
兩開水燉化和藥抱置懷中盤膝坐搖開口灌服再
向胸前抹之吐淨卽活三日內忌茶水或用南瓜脂
漿灌之

救服砒砒又名信畏羊血冷水綠豆服砒未久者用雞

蛋二十個打入碗中攪勻入明礬末三錢徐徐灌下吐則再灌以吐盡爲止如服砒已久不能吐者急用黑鉛一塊約重四兩用井水於石上磨出黑汁隨磨隨灌候吐盡砒毒方無後患

救服鹽滷夏月南瓜藤盛時肥梗剪斷有脂漿流出收瓷瓶內隨時可以救此患或以雞蛋二十個攪散入生大黃末五錢攪勻徐徐灌下能利瀉卽愈或用肥皂搗極爛清水調灌一吐卽愈或用生豆腐漿灌吐自安

救服鉛紛用蘇油調蜂蜜如飴糖與食卽解或用沙糖調水服或搗蘿蔔汁飲之亦愈

救服巴豆巴豆畏大黃黃連涼水用綠豆濃煎湯令服
卽愈忌熱湯

飲滷汁者血凝而死急取賣豆腐家所磨豆漿灌之滷
得豆漿則凝漿爲腐而不凝血

治被毆後傷風祕方荊芥黃蠟魚鰾三味魚鰾炒黃色
各五錢艾葉三片入無灰酒一碗重湯煮一炷香時
熱飲之汗出立愈惟百日內不得食雞肉

折傷骨者以開通元寶錢此唐初所鑄俗讀爲開元通
寶以爲元宗錢誤燒而醋淬研爲末以酒服下則銅
末自結爲圈周束折處

跌打損傷用天麻五錢防風五錢白附子一兩白芷一

兩南星三錢共研末酒調敷並服十分之一二

鐵飛槍草俗名鬼圪鍼此草山西陝西直隸徧地叢生
多在下濕處高二尺餘葉似菊而稍薄開黃花枝淡
紅色花落結鍼於未結鍼之時摘苗搗爛用敷跌打
損傷或研末收好水調敷傷處并沖水服之

蜣螂曝乾爲末以鹿血調之曝乾亦可代火藥但此硝
磺力少弱耳又烏銃裝火藥鉛丸後再取乾蜣螂以
細杖送入則比尋常可遠出一二十步試之均驗

水銀能蝕五金金遇之則白鉛遇之則化凡戰陣鉛丸
陷入骨肉者割取至爲楚毒但以水銀自創口灌滿
其鉛自化爲水隨水銀而出此不知驗否然於理可

信

治鬼魅魘人方

降香末一錢麝香三錢硃砂末三錢雄黃末三分皂角末一錢艾揉五錢右藥用草帛包爲長筒用瓦二塊封在內點火畱一頭出烟放在牀上牀下則夢魘鬼怪俱除忌婦人雞犬四眼

治疽發背方

大黃一斤酌用白芷四兩川山甲當歸鬚金銀花屠蘇酒方

大黃拮梗白朮肉桂各一兩八錢烏頭六錢菝葜一兩二錢右挫爲散用袋盛以十二月晦日日中懸沉

井中令至泥正月朔日出藥置酒中煎數沸於東向
戶飲之先從少起多少任意一方加防風一兩又方
三伏日取葶歷一束陰乾逮冬至日爲末元旦五更
蜜調人各一匙以飲之亦從少起永無傷寒疫症
治湯火傷辰砂末雞清水調敷立效

凡有顛搏刀斧傷者但以帶鬚葱炒熟搗爛乘熱安患
處速愈頻換熱者尤妙

凡有瘋狗毒蛇咬傷者祇以人糞塗傷處極妙新糞尤
佳諸藥皆不及此

破傷風能斃人用桑條如筋長者十數莖閣起中用火
燒接兩頭滴下樹汁以熱酒和而飲之

病從口入故君子節飲食患從口出故君子慎言語

紀文達公筆記載一寺臨河千山門圯於河二石獸並
沈焉閱十餘年僧募金重修求二石獸於水中竟不
可得以爲順流下矣棹數小舟曳鐵鉞尋十餘里無
跡一講學家設帳寺中笑曰石性堅重沙性鬆浮湮
於沙上漸沈漸深耳沿河求之不亦偵乎衆以爲確
論一老河兵又笑曰凡河中失石當求之於上流蓋
石性堅重沙性鬆浮水不能衝石其反激之力必於
石下迎水處齧沙爲坎穴漸激漸深至石之半石必
倒擲坎穴中如是再齧石又再轉轉不已遂反溯
流上矣下流固偵求之地中不更偵乎如其言果得

於數里外余於咸豐元年督運至景州糧艘失一巨
鐵貓求之下流數日不得偶意文達公筆記使求之
上流果得

余昔寓京師椿樹胡同門內北牆下有草數株初不識
其名偶閱紀文達公筆記載禮部長壽草云此草春
開紅花綴如火齊秋結實如珠羣芳譜野菜譜皆未
之載不知其名或曰卽田塍公道老余諦審之葉作
鋸齒相似花則不似草在穿堂之北治事廳階前甬
道之西相傳生自 國初久漸成籐今則分爲二歧
枝格杈極挺然老木矣曹地山名之曰長春草余寓
中所生適相似具體而微時 太淑人年七十迨余

出守江蘇迎養壽八十二而終余再至京師過舊寓
草已無存

紀文達公曰乾隆甲戌余殿試後尙未傳臚在董文恪
公家偶遇一浙士能拆字余書一墨字浙士曰龍頭
竟不屬君矣里字拆爲二甲下作四點其二甲第四
乎然必入翰林四點庶字腳土吉字頭是庶吉士矣
後果然

余素不好祈籤偶於嘉慶戊辰秋闈前祈得籤語勸君
敗北且圖南進步功名尙一堪欲識生前君大數前
三三與後三三是科落第庚午登賢書名列第二百
三十五下尙有二名是後三三也迨丁丑成進士殿

試二甲第九名前三三之數亦驗可見科名自有定數但讀書而不必強求